

摘藻堂四庫全書薈要

集部

欽定四庫全書薈要卷一萬七千四百三

集部

御定歷代賦彙補遺卷二十二

人事

竹巖賦

有序

明費宏

故河南左布政使程公用也以竹巖自號取其所樂者也而其心志節操實與竹類且寫竹逼真位不滿德委社遺盾今大叅君時昭侍御君時言文與行皆世其家遠到大受以究公之志業可前必矣予久辱大叅君之

知且與時言有場屋之雅欲永公之傳也乃為作竹巖賦其詞曰

前崇岡之迤邐兮後峻嶺之截業屹巨石之孤聳兮立萬仞之積鐵旁縈紆而帶徑兮中豁豁而成穴宜谷耕而隱鄭兮兼野築而棲說豈神剡而鬼鑿兮乃天造而地設相陽厓與陰壑兮蒨草樹之蔭翳或待春而始榮兮或望秋而早折曾日月之幾何兮炫紛華於瞬瞥獨叢篁之秀發兮貫四時而一節氣飄飄而凌雲兮筠青

青而傲雪陋俗夫之頑懦兮類正士之高潔偉伊洛之
苗裔兮實新安之俊傑知此君之可友兮身巖居以相
結心契合而無間兮如松茂而柏悅爾其因時培植撫
景盤桓寧忘肉味屢閱歲寒驗夜氣於息長兮勞日訊
於平安聽風韻之瀟灑兮翫月影之檀欒試新圍於擊
帶兮刻秀句於琅玕惟膠漆之久存兮豈異好之能干
若乃淨拂鷺溪間揮兔穎意適神怡心得手應假墨君
之面目兮發胸次之高興簡或指於數竿兮繁或至於

千挺分彭城之流派兮入洋州之蹊徑匪求工以致飾
兮聊寫情而養性爰離疏而釋麇兮遂騰茂而蜚英知
行檢之為重兮見物誘之為輕雖褊順而裏方兮靳不
忝乎斯名卻幕府之厚餽兮已蚤著夫廉聲辭禮聞之
聘幣兮亟見重於宗卿久敷歷於中外兮霈膏澤於民
生名與巖而並峻兮節與竹而俱貞然而年未滿於百
齡兮位未躋於三事豈天道之偶乖兮抑為善之難恃
留未食之餘報兮乃大發於其子占竹苞之芳茂兮即

斯干之兄弟登巖廊而競爽兮嗣德音而不替彼庭槐
之手植兮亦取必於來世矧孫枝之森立兮又武繩而
美濟藹芳譽之永垂兮疑美人之未逝辭曰有斐君子
在淇澳兮詩人美德托修竹兮嗟嗟元侯躡芳躅兮持
心操節異流俗兮千古斯名照巖谷兮

榮壽賦

有序

明
胡纘宗

鳳邨侍御張公以大典成未考績即封其父母如制其
父母壽亦皆六袞矣薦紳士夫以為奇咸歌詠焉纘宗

因為之賦

迺若蓬萊山人之於清都仙吏龐眉鳩杖宮錦霓裳徘徊於憑虛之境邂逅乎何有之鄉觸物而欲有言感事而罄所長於是山人起而啓曰若知夫蓬萊之異於人境者乎仙吏曰未也願子摘英吐葩攄懷迪思以廣吾之識也山人曰唯唯莫高匪山瓊島矗矗莫大匪海瀛洲鹹鹹蜃樓曉霽靈草冬榮巖壑峭崿金石鏗鉤其中黃龍遊沼白鹿鳴囿其上神爵棲林靈鳳集藪其下天

琛浴日精衛滔星其傍鮫室循麓鯤池鼓溟爾乃包乾
括坤邈焉中央隰嶼環碧巖窈凝蒼龜游蓮上鶴舞松
傍爾乃倨佺所止耄耄相望俯滄海之瀾瀾激神岳之
蔣蔣靈椿參差於西極蟠桃蚴蟉於東皇若魏郡晦老
以及阿媪固勝境之名流也爾乃春秋迪吉昕夕樂康
五福游行九老徜徉慶符絳縣和嶺康莊周喬龍誕漢
皓鴻翔瑞鍾光岳祥洽華堂桑蓬允碩岡阜遐昌李暉
彭咸先後為之接引麻姑王母起居與之頡頏顧茲山

而喜樂際斯世以耿光羌人生而篤祐肆昭代以履祥
彼仕版營營宦轍皇皇曾足以婉乎此邪仙吏乃睟容
而嘻盱衡而詰欲有以復也曰子誠山人也知蓬萊之
永年焉耳盍亦見薦紳大夫籍龍誥以褒崇夸鳳敕而
榮耀以大厥世者乎周官稽古王制執中既建太宰爰
布司封爵賞乃懋錫拜攸隆原一經之德覈五等之功
於人則加勲既峻授階亦崇於親則侈祿式富貤爵載
同於家則捧敕舞蹈宣誥屏營於鄉則銀青照耀金紫

崢嶸爾乃彩袍綴繡錦軸圖龍名敷禁籍績勒景鍾寵
延三代光映六宗顯顯赫赫礚礚顯顯然特恩莫致殊
典難逢此固天與而亦豈人能也予聞晦老以子為貴
因君而榮侍御要秩孺人令名錦衣星燦霞帔晝明陋
趙槩乞封以並顯邁孫逖求秩而自鳴恩寵優渥典章
華婉書傳祕閣草視文苑爾乃橋聯若梓蘭出其芽娑
娑椿樹燦爛萱花然鄉黨以齒孰與朝廷之以爵庭闈
以養孰與帝后之以寵龜齡遐算衆人而同孰與龍陛

殊恩君子而獨介福於年者獨厚於而身孰與貤恩於
世者并篤於而親子徒知勝境之享天年而不知上都
之侈天寵也鴻濛先生聞之便便焉怡怡焉欣然而笑
曰山人才得其一仙吏亦不知其二也予魏人也晦老
之所與也知晦老莫如予矣蓋聞大德必壽順德乃昌
是以魯紱麟以挺聖說騎箕而佐商文富申耆英之會
導安輦奕世之光鄴何應宿維昂申甫降神維岳香山
燕繪乎樂天渤海託形於方朔爾乃砥節業儒皓首窮

經翱翔乎書圃修容乎禮庭抱經綸而不仕游辟雍而
獨醒爾乃橫經教子詩禮並聞道德所濡蘭桂皆芬彬
彬鬱鬱德睟而文乃若鳳邨子淳洪鬯之蘊豐茂世之
英嗣三陳而濟美奏一夔以告成羨希文之有子視穎
濱而難兄聽鹿鳴於上國題雁塔之佳名製錦花縣捧
簡蘭臺雨滋八極雷動九垓屏閭山之冗淨遼海之埃
三吳驚其至兩浙歡其來撼具區而動盪震會稽之崔
嵬爾乃際大典於既崇庇鴻庥而斯溥爰追王乎先皇

紛馳封於庶府先近臣首公輔爾乃嚴慈同受綸綍之
褒椿萱共享斑斕之舞豸服翩翩均被於承歡之膝鳳
冠糾糾薦加於乘白之武文命值其誕敷壽筵適焉欣
覩躋六袞而千春偕二老以三釜啓家世於義皇夸閭
閭而簪組是以長庚粲粲南極煌煌伍山嵒薛湯水茫
洋噩噩博望灝灝新漳爾乃宣敕命以協華垂衣裳而
衍慶竭菽水而承顏引板輿以躬迎沐雨露而瞻天期
效忠於翊聖惟公之胄煥乎燕國之並封魏乎省華之

同壽丕乎韋齋之克傳昭乎晉公之必祐故天之生材也於是乎獨懋焉嗚呼蓬萊得公之壽曰公之壽維仁清都得公之貴曰公之貴維僕百歲維期何假黃眉之仙骨三少維衡何羨紫綬之朝紳今論者但知騁海山以相高炫爵秩而取勝齊末而言本舍道以趨徑是何足以考君子之世而傾大人之聽也於是二子聞命逡巡而謝曰微先生吾誰與歸也

壽岳母張太夫人賦

有序

明費宏

封夫人張氏為南京吏部尚書冰蘗先生諡清簡孫公之配太學生曉千戶侯暉之母也公敷歷中外卓爾自樹皜然不滓可與古之名卿頡頏下上亦惟夫人與公合德有相之道能濟登茲其訓曉及庠生映以及於暉遵公之教勤學守禮文與行能世其美古有女宗夫人可與匹休而無愧焉今年壽躋八袞耳聰目明步履強健四月二十五日實其懸帨之辰曉暉率諸孫世光等羅拜膝下戲彩稱觴上祝千歲壽親黨交賀懽聲動閭

可謂備百順之福者矣公以女妻宏宏受公及夫人之
愛實深今不可見矣幸夫人之壽猶公之壽第愧無以
發舒慶祝之誠乃作壽母賦以獻其辭曰

瞻銀峯兮嵯峨與崧嶽兮爭崇偉哲輔兮世出實淑氣
兮攸鍾孫紹祖兮芳躅名與位兮俱隆煥台斗兮在望
追表揚兮侔蹤宵北堂兮深靚藹佳氣兮鬱葱前慈竹
兮檀藥後諼草兮丰茸結彩雲於樓閣納祥飈於簾櫳
爰有太母作配名公光膺翟茀疊荷鸞封年齒兮已耄

神完兮氣充容觀秀整兮昂昂顒顒禮儀卒度兮肅肅
雖雖雪飄飄兮兩鬢星炯炯兮方瞳陋先零之弱弁挺
晚翠之貞松爾其景值夏初悅懸門右日北陸而方長
卦應乾而用九壯子穉孫竹森蘭茂拂曙盥櫛登堂趨
走悅慈顏介眉壽歌南山酌春酒奉潘岳之安輿翻老
萊之舞袖几列五齊尊儲四酎舉鼐取勺跽而獻斗煎
鵠烹鳧炮烹膾牡鼎臠迭進飫以加豆類瓜有棗如船
有藕嘉果芳蒹青黃雜糅鐘鼓具陳笙歌並奏抗音高

歌懽聲雷吼紅生面顯輝映綺繡襟懷怡愉坐閱清晝
茂族華姻里嫗鄰叟篚織紛綸以霞爛賀車奔馳而輻
輳羨已福之罕儷祝遐齡之采久若乃青鳥遠集玄鶴
高翔擘麻姑之麟脯御王母之瑤觴摘蟠桃於再實閱
海塵之三揚嚙元和以療渴餐沆瀣以為糧固將挹仙
姝之袂而優游泮渙同處於長生久視之鄉矣人亦有
言福非幸致慶以善積賢哉阿母動遵內則桃夭夙詠
於宜家棗栗克修乎婦職相我清簡實媿厥德食僅草

具服無侈飾勤約之風始終弗忒公遭聖簡鳳起求升
外之則旬宣蜀浙綏撫汴京中更西秦迄於南荆內之
則初贊邦政荐掌工刑秩宗典禮太宰持衡駁歷諸藩
周旋六卿師趙抃之簡易慕毛玠之公清飲冰茹檠騰
茂蜚英固其好修而自立亦由善助以相成熟不施而
有報孰能謙而無益獲祐於天宜登壽域將勗躬以訓
後羌既老而猶績幸養志之多賢能世守夫清白期華
皓之重玄必永享乎休澤逮孫曾之顯融尚屢膺夫寵

錫敢竊比於韋皋獨有慚於賞識記子墨而搞辭庶少
鳴乎賀臆

翰林同年會賦

明 李東陽

御水分隄仙家近闕文當作噩之年節應嘉平之月旭
日昀其載陽飄風為之不發于磐是漸鴻衍衍以來儀
出谷斯遷木丁丁而可伐乃有西江三鳳東海二龍壺
嶺交撐乎日觀台城獨曜於霞峯河馬既呈蒙蜀錦而
為飾揚金在貢囊楚璞以相從叶數應於方州地靈斯

孕歷星躔於歲紀天運重逢慨夫甲第同曹詞林諸彥
角百步於楊穿汴層霄於鶚薦陟唐瀛之峻引房杜而
齊登擷宋榜之華與蘇曾而並選藍袍映采游憐花底
之江寶炬聯輝歸識柳邊之院是日也或監或史載笑
載歌爛雲牋之麗藻灑月筆之微波耳聽流焱聲破過
雲之管心馳急景光回駐日之戈弛我道於息游或知
所止任吾生之順仰遑卹其他若乃麟閣遺風虎頭妙
手假物像以相求托丰儀於不朽夸競茂於松杉媿先

衰乎蒲柳名高君實爭取驗於兒童病瘦休文不自辯
夫誰某情因禮致貌豈心違諒金石之可斷陋蓬麻之
是依交可絕於嵇書蓋云有激知不逢於鮑叔生也何
歸樂以忘憂幸保無荒之戒敬之終吉寧遭不速之譏
非徒畢一日之歡抑以定平生之籍誠哉賓主之二難
允矣見聞之三益疇能爭滕薛之崇卑安忍眎越秦之
肥瘠吾寧不負期挂劒以相酬世獨何心乃彎弓而共
射復有芝蘭美德藥石箴言信榮辱之相麗匪升沈之

足論肉骨懷深念東西於離合勲名道遠競分寸於晨昏報以瑠瑤既可示交期之永好寫之琬琰終當與世講而俱存

交友賦

元孫仲宣

思往日之離羣兮羌躊躇而內顧恐明德其或疢兮執筵筭而求友慕夫子之倜儻兮迺徇芳而易臭欲砥礪以錯節兮不自云其寡也覽伐木之猷訓兮亦斯言之難舍也朝握荃以同嗅兮夕擗茵以同佩苟銘心而外

向兮夫孰為予之所諱民生各有匹兮藉良朋以為處
歷觀古人之自益兮孰熒然而無與使修名遂可孤兮
姣何姱之攸侶抱茲意以自納兮疑夫子之印許不留
真而食信兮察誠惠以相探言既吐而無昧兮行矯焉
而孰堪寧中道而拾碇兮反而置之璵璠鸛鳩之饒舌
兮百草萎而秋寒雉秉潔以內信兮謂斯物之在原悲
舊好之難棄兮紉秋蘭以貽子命蹇修為吾載道兮冀
瓊枝之相擬終盤桓而不荅兮顧濁流於焉下之心纏

縷而我猶兮曰子夷然而侮之信不穀之中離兮胡他
人之邇也所非共而為共兮指皇天以為正也惟往古
而既然兮焉疑之乎今谷風陳其恐懼兮暴公乃潛其
形苟非哲靈之睿識兮又誰庇之以心相夫子之緯繡
兮亦適足以自忝何所獨無芳草兮爾何視吾之褊將
高舉而求合兮周遊乎天望瑤臺之逸女兮見虞妃之
便媯余既解纓而為理兮誓纈佩而盟焉攬申椒始以
致贈兮中復雜之蕢菜情突梯而不眷兮意偃蹇而徒

屬羅滿堂之媼人兮曾莫與余兮一目度沅湘而東之
兮駕飛龍導乎洞庭令羲和相余之前驅兮驟豐隆以
清余之後塵倚閭闔而祈通兮訊下女之姍娉紛總總
其離合兮路曼曼其修遠叩靈瑣而假宿兮日忽忽其
將晚飲余馬於咸池兮悔相道之多眩幸年歲之未暮
兮戒鸞鳳助余西馳登閭丘與縣圃兮濟白水之淪漪
溘余遊此春宮兮適巫咸之可稽達高辛尚未先我兮
及少康之未有配屏雄鳩使不得媒兮諏蔓茝寓之芳

桂欣婉孌而首肯兮爰假言而申意曰蜉蝣之振兮夕
瘁其裳留夷之質兮歲以為常願綢繆而無數兮戒薄
俗而自臧彼舍旃以為德兮將怛焉而內傷

乍見賦

明 徐 燊

嗟人生之轉轂兮恒一東而一西恨踪跡之流萍兮真
聚散而勿齊痛遠別兮道路邈歎離羣兮天之涯傷人
遐而室邇感會少而情睽歎不意以遭遇或無心以追
隨既樂深而不殫復喜極而難持若乃曲院疎窓涼天

靜夜絕過客之履聲寡高人之軒駕落月滿乎屋梁寒
雲停於草舍倏驟見兮綢繆陳酒殽兮杯斚樂傾蓋兮
方新驚面會兮何乍烏鵲已飛鸛鷀猶却至若臨邊戍
客廿載塞垣雲埋龍漠月照鴈門遼兵朝闕胡馬夜奔
顧身自恨弔影誰言偶故人兮邂逅揮涕淚兮寒溫述
沙場之痛楚問鄉國之田園當年鬢髮兮白復白舊日
交遊兮存不存乃有五陵少年千金任俠重諾輕生報
仇飲血愛趙女兮秦娥指青樓兮紫陌過狹邪之娼家

遘邯鄲之賓客選絲竹兮徵歌奏笙簧兮按拍玉燭羅
幃瑤筵玳席行醇酎兮千巡盡歡娛兮永夕或有深閨
少婦久別征夫雁稀鯉絕日居月諸秋風冷落芙蓉帳
夜月空明翡翠繡愁復愁兮容色改怨復怨兮形影孤
值夫君之歸輪聞門外之嘶馬涉遠道兮言旋喜從天
兮而下慶再世之伉儷隔幾年之春夏嬾婉由此兮重
伸別淚從今兮不灑至若永巷長門深宮淒惻紅葉傳
情團扇掩泣著舞衣兮空自傷歌悲愁兮倍於邑閑椒

室兮徒含情恨君王兮不相識一旦親召幸非常賜顏
色得寵有時永恩無極其或才子風流高唐夢寐朝朝
暮暮雲雲雨雨二八佳人妖嬈旖旎被繡縠兮桂裳服
羅紉兮績綺迴眸轉盼芳心歛起雖夢幻之非真亦交
懽之堪喜又若修真羽士拔宅飛昇黃龍可御白鶴堪
乘遊玉樓兮金闕踏紫府兮瑤京視人間於凡濁謁上
帝於杳冥拍羣真兮嚼瓊蕊揖八公兮參雲輶欣聚首
之有數幸宴樂之非輕若夫流落羈臣長沙遠謫鵬既

來棲地復卑濕一朝命下身歸舊國談夜半之鬼神令
至尊之前席上與下兮相親悲與喜兮交集又若文人
墨客千里神交偶通姓名於逆旅或枉車駕於衡茅似
磁引鐵如漆附膠又有苧羅妖妃江漢游女逍遙水濱
顧盼江妃一見兮目成相對兮魂褫既贈珮兮委心不
投梭兮折齒別離倏忽遘會非常雖日月之逾邁豈中
心之能忘覺悲欣之交戰疑晤對之倉皇誰能當綢繆
顧戀之際而不神爽飛揚者乎亂曰擾擾浮生真過客

今世路多岐何偏仄
今人生見期詎能必
今悵悵憂心殆如積
今憬迷途之茫茫寤
天地之何極兮

擬齊梁內人送別贈拭巾賦

明 祝允明

初裁白紵白如霜
舊遺團扇月含光
紵拭不減何郎汗
扇搖空想婕妤涼
何如贈巾意勞君
轉蕙腸若乃龍胡
交錯玉線綢繆輕
挹珠散舒動蘭浮
不忍挂匡牀詎忍
委玉箱留取炎熱
將歸去茱萸幔底
拂鴛鴦

病賦

明 謝肇淛

有體虛公子者怙意參汰被服妖妍耽娛騁縱忘反流連知昏形槁困於拘攣四體失據一息若綫大期將至咍咲憂煎醫屢踵接覲輶牽惴然疚懷瞑眩眈眈於是葆頤海客造而請曰伏聞公子高義馳驟天下緼袍菅屨之末望風景附而不知玉體之有所苦也願承下風勿藥而愈公子彊起坐有間曰客將何以詔之客曰夫天有五賊荼毒萬有人有七寇攘搶肝腑故陰陽錯紕寒燠易處喜怒怫闕情性割運魂氣越佚邪迺中蠱

君不守宅神將去女是其造端也在目之上眉之下而
其蹈厲也不颺而戰無霖而腐在易為山下之風於經
為惑男之女故自萬乘千騎之居迨夫甕牖芒屨之侶
莫不紛還天札屢感臯畧舍喬松之遐算榮蜉蝣之朝
羽此軒岐所為歎息越人望而卻走鉤摯投砭而仰天
和緩捧心而高拊者也豈不哀哉公子曰然則病不同
乎曰不同夫品物萬彙殊性難名蒸民兆柿異氣分形
或口飫膏珍或味甘芹萍或體憎紉縠或編草懸鵲或

強而實或虛而瘕或樂而聲或僑而盈矧九氣之分稟
洎五方之咳𢑦倏壯榦而疲恭習山海而闌闐倂象幻
態惟其所攖故病緒千別病抵萬莖巧厯之所不能盡
巫咸之所不能明羌請識其崖略以代要言之衡公子
曰願聞其目客曰璇極之宮紫微之域左翼勾陳右扈
太一滄滄溶溶沉沉滴滴鄭衛燕趙靡曼靚冶之妹聯
袂繹衽充房彌闕色授目招娛晨專夕鬪意爭妍窮歡
盡佚溫柔為鄉袒裸名室淳母羶鄉醞醇酥臚魚腍烙

麝截脂煎鹹灼舌焦吭糜胃吸液晝卧組績之茵宵處
純綿之席狐羔貂毼纖綃紈絺錫璫璿璣瑜紃紈藻絳重
沓繆綢徽纏燁燁出輦入輿連琴接幕魏臺避風薄櫨
韜日筋緩骨鮮精敞髓竭魂搖搖而去體血熒熒而謝
色瘍痕外淫痺癰內逆既暈且怔兼蒸而呃勞瘵乘之
鬼瞰其竇雖復三參九芝百苓千朮徒能縫其腠理豈
能去其蝨賊是為富貴之膏肓宴安之醢毒其流一也
至若都邑之會市估之塵驚名射利輻輳駢闐朝履繁

霰夜冒荒烟暑衝瘴霧凍輟冰淵竭燈星露之埜戰
陵瀉之邨喝不得解頓不得眠是不得息餒不得餐仕
九遷而靡釋賁三倍而彌慳計營營而四起慮幢幢而
百攢素衣已緇壯色空殘腸九迴而寸斷顙一夕而華
顛加以風日之所耗斁沴祲之所橫干得喪之所掉戰
冷煖之所控搏容神困憊筋力闌痺面目薰馘心府冤
煩戚施蘧蔭中熱內寒不于鞅掌鹿鹿懣懣溘先朝露
孰保天年遊魂蕩魄不得望里門是為火宅之固癖塵

海之魔患其流二也爾乃潛穎鯁生佚宕文士瘁掌下
帷懸頭刺指濡首墳素之場驚志丹鉛之海抽思腐毫
研象吞紙冥搜荒揣則日月不易其明慘澹經營則雷
電不入其耳而況寒暑之剝膚風露之燥體滋劑之戾
身邪氛之襲趾莫不反胃噦肝吐腸哈髓種髮焦毛枯
血墮齒心同泥掬面如灰死火色上騰元氣中移或痿
而不男或消而結癥雖日觀曲江之濤時賜金莖之瀝
苟筆研之未焚孰沈冥之可起是謂毛穎之宿業縹緗

之奇鬼其流三也其或孽子縈臣蚩氓窮戍丐媪荒黎
逋僮僇女瑣尾顛連零丁慘沮三旬九餐尺霜寸絮採
薇蕨以充腸吞蠶旄而禦沍膚龜坼於曾冰足皴皸於
巉路貿貿而卻嗟來踽踽而艱跣步羨一飽之無時號
五夜而莫顧腊肢瘃指輻臆盲慮目眈眈以矇眊耳淫
淫而聵注豁磔确以轄裂蹠蹢躅而顛踣踣羸宛轉捐
瘠微毫精耗形敗肉消骨吐但喘息之苟延溘薤上之
朝露是為窮崇之瘴鄉悲田之劫數其流四也若乃牢

騷遷客薄命閨人茹冤莫雪銜恤弗申徘徊糾結怫鬱
惓惓撫長劒而太息促玉軫而愴神望明河以掩涕送
雙鴻而填膺指白日以為正呼蒼天而不聞夕風揚而
悽思寒蛩咽而墜心怨衆芳之四隕哀連理之中分歎
恍懣以憇懣軫贅憤而煩冤食哽噎而不下衷恒悸而
難眠胸餽餽而糅輾氣塞逆而上奔飴甘不自強笑無
驩匪饑匪渴非慘非溫塊然醞釀於方寸自起伏而牽
纏察之無色診之無形金石湯液之所不及厲熨火齊

之所罔攻是為幽憂之疾一中不可復生其流五也是
五病者起於豪芒貫於情想達於脈絡錮於腑臟非出
神入聖之工探微測隱之望疇能止之未然察其影響
若夫雨暘燥濕之感山谷垢穢之罹瘕癰腫瘕之異魑
魅妖魖之奇痿癰瘕瘕之變晦明勞佚之機堅栗閼泄
之狀亢承從逆之宜固勢轄而無窮羌難得而備知公
子曰然則為之奈何客曰誕生閉藏四時之德順天襲
地聖人之則存神攝形迺與道合起居有宜弛張以法

無損爾和無營爾魄反視却聽神將自宅無燕以淫無
耽於逸終日乾乾形將自植且夫天地為爐兮水火為
鑪五季鼓鑄兮大冶莫躍倏而胚胎兮孰知橐籥化為
異物兮又安所避其罟獲彼刀圭之藥餌兮僅救敝而
舒厄曷頤真以守志兮終睟盜而膚碩夫明聖之齊慎
兮夏密陽而春葛縱天壽其何貳兮樂天知命又奚忤
於是公子羈然而笑惕然自約顧視二豎兌喙而卻

逐病賦

明
徐世溥

徐子以甲子季秋娶婦序當挾瑟禮協授衣顧常多病
率一月不盥櫛勝衣善食治事者歲不過十餘日至於
辛未垂及八年其妻嗚咽斷續而言泣謂徐子妾病久
矣為婦無良以憂夫子自我十六嬰疾來歸呻吟下車
廟見有違蓬垢楚毒畢歲處房晨昏之節問省不遑惟
病之故謬禮尊章蜡社伏臘陳宿獻鮮人具拜起我獨
不然惟病之故烝嘗以愆冬不知風夏詎識暑弗獲歸
寧日惟閉戶惟病之故睽絕父母姑姊遠來姆姊出迎

顏色敷愉中堂笑聲惟病之故我獨伶俜未壯先衰脊
胔鬢斑久視目眊將語咽乾惟病之故任育孔艱皇天
閔予亦既有子寄乳保嫗提攜頑婢惟病之故母慈大
戾子有嘉賓命敕盤飧簞籩不時邊豆用艱惟病之故
中饋多慚子復志營四海道抗嘉芳窮年矻矻遠語羲
皇夜陳編以達旦今寧知荼苦之在牀妾安敢以怨子
願錫余以良方徐子攝衣起而筮之筮曰有鶚南飛道
邁鳳皇不懼鉞石所畏文章日者曰吉今日乙丑時加

於未蚩尤破軍先發者利子誠逐之功賢黃帝乃具桃
及萍醢火揚言告病汝奚嫉我汝作呻呼日灌予耳汝
為疋羸俾予日覩汝欲苦人實則予苦將欺予之窮而
不能達抑玩予之文而不能武耶我將數汝情狀究汝
根株汝善自謀速走他區病乃言曰使子言而當則善
矣言而不當職子之羞苟其中矣孰敢稽留主人答曰
我友俞跗列汝千名咸汝醜類分蝕人形其在閨孺未
中厥情其一曰潔鏡無留暈衣無渝褶刮滌窮微是生

內熱其一曰敏應聲趨事聞言自引小大悉裁釀為渴
疹其一曰勞米鹽薪蔬晨起紛囂口燥筋疲發為煩焦
其一曰慧既休筐績安希文字五言未成百疴已至其
一曰鬱已食不步影不踰閤含憂弗愬怒蘊不越沈遲
展轉積為紆結其一曰褊婁婁飛言婢僕微訕衷實不
平恚復不顯橫攻胸臆逆為噎蹇惟茲數者是生百罹
在肌為潮中絡為痺晝工奪餐夜巧侵寐我具告汝汝
奚遁情亟善自謀馭風而征無入高門閤閤同條懼汝

所過羅綺損嬌無造市廛毒我人民懼汝所過老稚悲
嗔無登崇山雲路攸藏懼汝所過草木萎黃無歷江河
魚龍恬萃懼汝所過舟楫底滯無經曠野莽蕩何極懼
汝所過空虛偪側凡汝之為無適而可我為汝計汝亟
聽我惟王建吏鞭撻責貨殍民以舖垂腴虎坐大慙吏
胥肆威賊猾衍衍肥哲以蔑王法將征西南西掠以狂
戮佃奏凱悅豫且康湯湯閩海鯨掀白日貢金誰何彊
矯安吉田車羯鼓趯趯施雄流移行郡秦晉望風犯順

舉燧攘畔東北振武用師十年不克凡此六塗實汝攸
宜何去何就聽汝所之豈獨勦兇蟲於王國抑亦伸天
威於四夷病乃戰慄屏息拜辭遠遊於其明日夫人有
瘳

罪鬚賦

有序

明
靳學顏

予試童子見有魁梧而甚鬚者命作此詞不諧吾意遂
援筆製此以示風焉辭曰

遵彼旄丘莫赤匪狐叔兮伯兮有鬚丈夫爰自鄉甸來

適都市曰往試乎偕彼童士童士曰嚇于思于思譽髦
方臻爾胡為哉兵衛總總大夫在公髯於衆中緣階自
東既旅進以獨聳指危冠而上衝乍引領以斂翼忽脫
穎而露鋒於是髯也俯而不昂肩高頤隱欲蓋彌章大
夫曰髯前吾語汝道遠云來跋蹇良苦汝其心童而貌
則皤顧名思義人其謂何髯謂大夫失之子羽長揖不
辭將歸有處既歸返舍盛氣自厲攬玄錫之光華鼓金
錯之利器鏗將舉而未下先聲罪而天意曰陶無見膚

其以汝貴何吾殖汝迺貽棄累凡吾百體纖悉有以齒
決爪搔冠以髮紀睫衛離朱毛通肺理婉彼兩眉所占
無幾輔頰匪尺而據踰中實繁有徒汝吾奚功發論則
附以作勢微詞則鬱而不通解顏而燦然之美若失長
嘯而宮商之旨弗融雖有嘉食淋漓引臍雖有麗服覺
我形穢流火之期揮汗成雨紈扇弊搖亟麾不去積塵
為垢積垢為濡無而不治疹其興諸是用多方前理拂
疏嗚呼子賢汝大負予上官見憎職汝之居龍蛇之蟄

時有卷舒寧不少潛以忍須臾顧乃森發爭張競挺參

鬢侵顴翼顯蔽領黃氛繚繞赭茸不整使我染翰無光
吐氣不揚誓將決汝離彼故疆已而鑷人呈技待詔獻
功芟蕘搜剔根株斯窮長條冉冉以錯落弱苗離披而
飄蓬既乃假寐隱几憮然自喪鬢作人言見夢陳狀曰
予受命與子形俱妍媸在子不在吾鬢內充外瑩血氣
有餘赭茸不整子血中枯不曰妍乎綽約妙姿黝光可
鑒玄珪載垂穆穆長揚清飈吹之落落喬松麗葩施之

吾於此際何負人爲且夫鼎龍墮小臣之泪編虎設尼
父之戒責須上興和樂示愛子之無情一何自壞禮云
斯須不可去身我須我友詩範人倫智者不拔一以利
世何吾子之棄彙而捐親

愍貞賦

有序

明 郭造卿

貞烈何氏淑靜者太康諸生劉用九妻也劉生疾不可
起何即夫死以相從視含輒以所御巾紈納生袖中呼
曰待我待我尊章戚屬持之萬端不能奪自經者屢矣

姑與伯姊覺而解之不得死水漿不入口者旬餘竟乘
間以白練雉死柩傍也死前出所繡枕有並秀雙清句
示侍兒曰此吾志也今堪獨秀而孤清耶取嫁時衣火
之爍若蓮花狀死後塚上芥高丈許隴麥盡一本二穗
且有二百八十穗一本者吁嗟異哉其斯奇節所繇徵
矣余業已為之傳茲復賦以愍之而序其略

嗟彼靈丘兮唯嵩與嶽嗟彼汎瀾兮唯溷與洛有婉其
女兮出潁川之閼閱稟奩度而靖旒兮儼春洲之麗萼

憶在昔之綽約兮日修潔而處幽承芳徽之風邁兮思
古人之無訖將儀特於鬢髦兮紉芳芷與杜蘅宛內美
之衽袂兮顧淑靜之佳名懷琬琰以為心兮呈珪璋以
為容纓蘭茝而作佩兮珥延喜而為琬將采儷於蹇修
兮宜占之於靈氛謂兩美之必合兮奚著蔡之足云蓋
大人之與舅兮結交之素也締盟而世好兮唯婚姻之
故也爰納采以成禮兮因媒氏以相聞迨及笄而結褵
兮乃歸字於夫君嘉夫君之德音兮采衆芳於嘉樹鳳

鳴鏘鏘兮將迴翔於雲路憫天孫之靈匹兮怨別離於
漢渚何嫵婉之如此兮將琴瑟而日御爰蘋藻之為蠲
兮菽水之為豫方七稔之薦歡兮若不知其何底雖日
月之邁盡兮期百歲而同死非夫君之不辰兮實妾命
之多薄羌薜英之煜煜兮不崇朝而殞落至不可藥而
代之兮後雖九死而莫贖感成說於古人兮追前修之
芳躅敢素心以自行兮願偕逝而同穴惟久信於一言
兮不須天之以皎月哀夫君之飲泣兮謂不將乎父母

也鮮兄弟以終養兮余可以無死也妾雖備於中饋兮
幸不勞乎井臼惟舅姑之方將兮而尚可以圖後嗟夫
君之謝妄兮乃彌留而強作謂待此以瞑目兮敢不薦
之於棺槨故且泣而且止兮若束裝以遠將耿余衷之
不渝兮何緯繡乎相防忍夫君之先我兮睠昔日之懷
袖納巾紈而執手兮未將與之而俱就不頓絕而復甦
兮求白刃之弗獲惟此心之好姱兮取乎縞素之為白
皎潔而微柔兮輕盈不踰乎咫尺緊繫妾之綱常兮視

之重於金石甘匹婦之為諒兮魂恍惚而相持姑何為
而余解兮若綴旒而益悲舅氏之哀憤兮意妾不以古
而自矢彼共姜之咏柏舟兮為不諒乎人只或斷指截
髮或割鼻勢耳彼淑媛之遺則兮亦堅貞而後死妾聞
言而侘傺兮重結軫而迴腸昔之黽勉為婦兮期少君
之與孟光豈妾之展無焦詬兮荷舅姑之是臧幸割愛
而加餐兮乘春秋之未晚啓雲初之嗣續兮俾逝者之
有焜曾一言之許九京兮今尚敢稱乎未亡令舅姑之

我憐兮雖溘死而永傷縱微軀之圖存兮曷裨於高堂
水背流而自竭兮木反根而不長願蚤賜畢此身兮方
知善懷之有行羌不得間於左右兮空引練而自決姑
慰藉而乘熾兮取水漿而薄啜昔六日之不詹兮思予
美而恆恆豈忘此之多日兮能展轉而獨寢魂眊眊而
無歸兮悲古人之賦乎角枕曾粲之以女紅兮因之以
寄乎余情惟松筠之交柯兮梅月之晶鑒示左右以夙
志兮豈獨甘乎乳乳何芳蓀之潛穎兮謂夫孤清而獨

秀乃逾見乎修姱兮豈知妾心之孔疚寄速奄於寢廟
兮適伯姊之覺余復懵懵而于悵兮如嬋媛之女頽痛
垂白之諸姑兮以靜慙而寡倚涕漸漸而讓余兮不知
彼之好修豈知孤妾無依兮奚襁褓之可望因許死於
夫君兮曾待此以屬纊志怛怛以迅直兮心煩懣而怵
怵衆女之不吾周兮故婉詞而從容伊人之為高士兮
亦詫異而唁予謂不眈乎青陽兮而清節之是娛念父
母之北征兮願少母死於須臾豈捐罔極於千里兮而

弁髦其遺軀但儵忽而覲覲兮徒瞽亂而欵歔憶余家
之彤管兮有殉義之媵烈大人昭躋之而涕洟兮謂與
古之女而並列今妾之獲所死兮諒不以為無庸而慘
結知儻徊之何益兮早已捐乎佩玦故臨別之泣血兮
歷鳴此而永訣但羈愁於萬里兮願妾計之遲遲求善
使以慰其心兮勿因嗤女子而重嗟咨昔叔伯之不予
忍兮曾涕潺湲而言此惟弱魄之含穢兮無以他人而
我入處若夫東郭之旁兮大人舅氏之宿遊願幽魂雙

棲兮寄孝思於荒丘昔自母氏之敬戒兮禱祝之有常
惟余性之慧儆兮將集芙蓉以為裳貫藕絲以為帶兮
組荷葉以為囊取同心以並蒂兮不獨豔而孤香雖纖
手之未就兮實余心之所藏哀衾綢之不復御兮豈服
之而無數也取炎火而秉畀之兮恨不夫君而同薌澤
也何茲之亦靈兮宛芙蓉之秀發榮之始如夜光兮而
輝之揚於秋月觀之驚怪兮疑妾魂之超忽庶見跡而
知心兮許妾同灰以俱沒妾雖沒而豈徒兮將與古而

齊芳同鑿杓於二女兮合矩獲於貞姜彼貞姜之漸臺
兮持符命之不至舜南巡而野死兮伊二女之遠寄矧
信誓之旦旦兮死不越乎閨壺幸首丘之可從兮胡不
溘然與偕殞暨今之不先朝露兮恐白日之婉婉詠黃
鵠之獨宿兮嗟魯女其何求如衛女之冢上兮化二雉
以奚猶壹志之各有當兮自古人而固然奈妾志之獨
異兮亦受命之不遷故結結而蹇產兮不可解而釋之
宜彼其之不知兮戰戰而迫阨之人之輕生於鴻毛兮

亦臨穴而惴慄乃入淵而援手兮惟恐淪胥之不疾真
視死之如飴兮故竟輟乎水漿雖憺憺以恬愉兮自有
瓊靡以為糧神罔兩而無舍兮形枯槁而將亡魂杳宵
不可招兮空筮告乎巫陽爰永辭於白練兮不離夫君
之旁歎曰女人之貞百家之宗兮美人之貞丈夫之風
兮辭且婉婉謚雍容兮銷鑠而竟殞若芙蓉兮芥生塚
上其高踰咫兮邱園之麥兩穗藟藟兮且有二百八十
而共一本兮獨秀於冢上何其有苑兮猗嗟貞人羌獨

無異兮風本攸植是以瑞兮

疑賦

明馮時可

天吳四目據帝關矣土伯九約游人間矣星辰晝見日
反舍矣江湖逆流海成田矣蜀鳥啼北禾生貆矣濟貉
踰汶柑移燕矣秦馬有角楚猴冠矣胡羝生乳魯牛言
矣嗚呼噫嘻魁昏杓旦左梧右檜嶧高岱卑北嶼南涼
上履下幘綠衣黃裳覆苓羞喙登鮑踐魴汪罔為短焦
僥為長蕙芷為臭蕝茂為香駘駕絡金駉裹服箱嗚呼

噫嘻康瓠何寶周鼎何棄干將何藏鉛刀何試家雞何
賤野鳬何異西子何斥嫫母何侍黎丘之鬼何親而媚
鼈令之尸何賢而位嗚呼噫嘻世道日波人心自寒鵠
鷗致譽鳳鳥見彈龍章薦壤鵲結服官大呂蒙耳北里
環觀松柏培塿蓬藿嶺岼漚管殿陞伐檀河干擲果左
思飛瓦潘安嗚呼噫嘻貞瑩潔清不為世知突梯卷鬢
顧為衆奇吐肝瀝膽動而見疑鼓舌搖脣或以逢嘻駟
騄大府秀孝中達嗚呼噫嘻箕畢殊好參商異躔周璞

工笑琴鯉庖捐敗素成紫棄土為埏息壤堙水文石補
天麟出不祥雉雒成愆市人攫金堯何投焉楚人毀玉
秦何珍焉朝賢暮佞此憎彼憐孰是孰非孰測其然嗚
呼噫嘻昔之士論好進為羞今之士論恬退為尤昔之
君子藿食民憂今之君子肉食身謀桀者居間賢者雅
游溫語陽春烈心勁秋嗚呼噫嘻誰秉國鈞而無典刑
度不視量衡不視星以意長短以我重輕衆口囂囂搶
攘廟庭附和為蠅隱賊為螟烏無雌雄水合渭涇孔不

能裒墨不能停童殺無罰金人孰銘嗚呼噫嘻文幽孔

阮回天憲貧左丘盲目屈原沈身秦標功德莽肆威神

湯延七葉曾食萬緡古既昧昧今益泯泯誹俊疑桀獎

頑異器壬夫如主造物如賓攬秘紛拏曾莫少嗔三彭

賊物五酉凌人優或集苑聖且迷津瑟愚筭利書滯錢

神先生不解黃陵是揆乍如嚶嚶久乃提撕曰若所卜

見猶羣黎乾坤渾蕩包塵納壑變化相詭幹流不齊或

推而還或抑而躋惟彼聖知不為世谿執神之機窺天

之倪蚩蚩佞諛險宅卑棲竭慶一生腐鼠醯雞以此羨
彼持壁易韞若自反覆顧謂世迷至人無物至道無蹊
玄同冥應何疑何稽

驅慙賦

有序

明楊於庭

昔揚雄有逐貧賦韓愈有送窮文凡以宣鬱抒衷用附
孔氏各言爾志之義淵明有言夫道達意氣其惟文乎
余業以慙廢矣居間躊躇作驅慙賦比之二氏敢云肖
哉

楊子既逐屏於田間衆猶嗥嗥聚蟲成山哆彼文貝羣

飛刺天九關峨峨一斥不還好我者勸庶其復然然即
溺之衆曰基旃衆曰基旃亦既譁只雕蟲厚詒借箸蒙
恥市虎噬人蜮沙含矢厥讐所繇戇故之以迺叩靈臺
呼戇與語胡汝從余斤斤自喜進不程時退不量已不
諧與人不同事始自典方州汝則余邇幸而無郵汝食
寢此錢穀甲兵余則尸之方枘圓鑿職汝之為人皆謁
臆低眉解頤汝獨抗顏研研若蚩人皆嚅唳呶訾慄斯

汝獨闔論眎人如遺人皆炙輶如珠在匣汝獨螳臂怒
而當車怨汝之的禍則余罹懷璧其辜誰為我辭他人
朝夕靈通與處曲鈎公侯從車上僭而汝悞我齟齬踣
蹢辱在泥塗偕禍之父妻孥尤余咎實在汝余靜汝愬
余動汝鼓豈無他人繫我是主借曰未知厥效可覩汝
其行矣則莫余侮愬曰唯唯為謝主人余亦何負汝亦
何嗔汝卹汝官不卹汝身苟名之立黜也何裨不佞之
先世有明德昔佐王陵漢祖早識廷爭諸呂義形於色

人臣之義陵也伉直繼事長孺中流砥峙招之不來麾

之不去布被丞相深文御史蹇蹇面折唯余先子輓近

突梯肉食者鄙雖復撫仕千夫所指謂子高明少而習

焉譬之臭味維子之荃束髮從子抑亦有年成子之名

比於豪賢衆能鱣子子誼益鐫寧玉而碎毋瓦而全亮

子姁節可以長久誓投四裔與子相守不謂末路厭如

敝帚刈方為圓於余何有余去不復誰為子友繞指誘

子塗澤而走頤指盱衡亦孔之醜懃詞既竟目張色厲

人之無恒請從此逝適彼首陽訪彼下惠侘傺不顧壯
夫所礪余乃避席自投於地庭實負子子則何罪古人
服義過亦不貳請終事汝亦又何懟懟遂不去寧甘廢
棄仲連有言貧賤肆志

禮貧賦

有序

明
黃省曾

予讀揚雄逐貧賦末雖揭露反正而憎戚厭苦厥心當
無釋然竊希仲尼不去而樂之義作禮貧賦

黃子閉戶與貧胥處歷年四十肅貌敬禮顏無忤色口

無訾語麾之則從凡命皆喜賓於茅齋弗敢怠侮左右
盤從形影為比仲夏吉日攬貧登堂拜而致言曰玄哉
爾貧虛妙曷測善蔽弗成是為天德宰而不有施而不
積蕩乎難名熙相萬物昔毗堯舜投金抵璧藿羹糲粢
仁覆蒼億勵說操版吏望秉戩舉粥作師皆汝之力大
任將與勞震筋骨逅吾仲尼要久肝膈曲肱奉枕疏水
奏食偶旅陳蔡琴歌共懌兼友淵參原憲歡密簞瓢在
陋饑餓屏跡龍行逾高鴻揚靡忒主亭者何織葦者勃

寄餐牧豕耕草釣澤翕爾顯庸侯王竹帛繇是觀之得
汝者成名失汝者穢慝上建神哲下起勲績處以修躬
蓬蒿潔白出以佐采貞素表職生而恬康樂天自得沒
而無疚奕代軌式遺安子孫錫慶綿蟄僕自爾來為道
增益氣凌青雲心對皓月聖途尚羊王徑被飾卑細蠅
蟻啖眇貨殖山藻誚愚千駟鄙沒糟糠令妻考槃淑息
萊子見遊裘公樂集却謝車馬孤抗泉石國無妒人鄉
靡怨客門可雀羅消搖坦適修夜常寧安衷鮮惕出無

留顧入靡紛迫偃仰探經肆精奧極溢吐文章條貫矩
尺端言蠕動庶幾為則名播九方甘守沈寂與汝蟬媽
豈敢踈逖樂只君子頌汝朝夕於是貧聞而喜乃告予
曰吾與子居曠久習便吾有胸臆未與子言我貧與富
皆命自天天有二役授與不愆富畀小人貧歸大賢貧
者福之富者禍焉滔滔貪墨乃與周旋盜跖吟口惡戾
彰宣狼咋虎冠德義委捐烏羸畜牧猗城監鹽洒削胃
脯鼎食騎連好之則聚慕之乃前不趨冠鈔則在市廛

凡百溺之鮮不覆顛高明鬼瞰醲肥瘵纏妖豔瞽心桑
濮奪延智者使昏方者俾圓愛斷懿戚虐起貴權攘奪
篡竊競此致然仇繇賂滅榮夸利孿郿塢取戮金谷自
殲多藏厚亡散如塵烟宦雖巧捷隕之重泉斬宗殄祀
墟宮莽田他人入室其道好還帝王張奢祿且不傳況
彼蠹庶乃握貨權天阜資具均濟普全匪伊私獨可以
掩專分踰必折徒取瘁煎富豈嘉德迷夫同憐情傾志
嚮癖嗜罔痊凡今之人唯金與錢子既知吾吾敢舍旃

願與終始垂休萬年

廣招賦

有序

明謝肇淛

廣招者謝子為其友人鄭琰而作也琰既流落江東邇
迴維揚徐邳之間不遘知遇困躓以死一身孑爾四海
無家精氣越佚不識故里若敖之鬼鄰於餒矣夫死無
所歸而殯朋友之義也魂不復而招之古之制也迺作
廣招之賦音沿楚些紀地也

秋憫慄而泆寥兮浮雲冉而上征駕素輶於荒原兮白

驂躑躅而酸鳴蔓蔘施以蕪穢兮氣習習而黝瞋羌何
為邁此窮奇兮恍惘惘而匿明曜靈瞪眎以弗及兮帝
迺命諸巫真曰廣陵有使骨焉魂旣憊而不復女筮予
之招兮余且畀之南服巫真對曰夫幹貞固者所以為
修也魄搢桷者所以浮游也幸帝命之不延未及附諸
糞草予無所用筮焉乃下招曰魂兮歸來胡為去君之
與宅曼衍於大荒些離君之頽哲而儷彼幽盲些辭君
之粉榆與埜妖顏行些棄茲祊祧中道徬徨些歸來歸

來止故鄉些魂兮無東東方大壑不可以泳些燭龍銜
焰焦轂液勒些龍伯千里眴目若電其首若燬些鰐鰐
連山斷齧戟卷些飛廉被髮盱眙談些一廟其牙為齧
粉些魂兮歸來無矻碩些魂兮無西西有流沙冥邈無
垠些玄蟒桀血三周崑崙些赤狐黑獾扞攫𦏧𦏧些榆
晷入土沸獲呂播掀些雷淵陰火歷錄研研些藁管萬
里絕飛鳶些礧礧窳窳雷轟填些魂兮歸來空煩冤些
魂兮無南南方酷癘天地鑪些蘊隆蟲蟲焮咈噓些蝮

蚶銜象牙專車些即且蜷螻猴猓猓與龍爭珠些蚬
蟬有顚齧人如飴負骷髏而趨些艾軀玄兕品品鑿鑿
些焰崗燐液金木殫枯些焦毛爛額灼研膚些痞疹瘞
癩痔且疽些魂兮歸來無自刳屠些魂兮無北北方凍
沍凝洛澤些白草黃沙連大漠些黑磧霾空無百穀些
六月霄霰晶搖薄些冥窳嵯岌轟咤噁些玄冰固地戰
陰壑些野叉獠狻猊敵敵哮趨趨些辮髮反踵鬚鬚
髯鬚戟手攬摘些漣乳臙臊無炮烙些魂兮歸來虞蹂

躡些魂兮歸來無上天些天閻黠黠亘九埏些戲貓玄
軀搯下人些乖龍鬚鬚磔鋌鱗些雷霆砰礮電激電擲
不可進些蝦蟇纏蜷吮膏若泉些上帝高居默不聞些
魂兮歸來墜靡厥身些魂兮歸來無入此重淵些幽壤
黝沕無晨暄些蝸蛎扇鬚披髮躑些山魅谷魑踉蹌摩
人以吞些朱髮豹禪獰且饒些羅刹鐵額舌赤如火食
人三千些陰飈哀嗥血池肉陵赭殷殷些火山刃林鏖
剉煎些魂兮歸來無逡巡些魂兮歸來入閩邦些翠峯

堪岬黛華崗些寒流瀟瀟鳴石淙些靈室閔洞宵崆峒
些蘄瀑激雪花雨空些芙蓉葱蒨攢青蒼些金芝瑤卉
燿夜光些芝房輪菌乳膏潢些丹牀玉几紛從橫些毛
女羽客顏若童些壽跨喬衆踰眇彭些魂兮歸來馭氣
以徜徉些三山蓬閭鼎鼎嶙嶙些長江金鎖潏澶澶些旗
張鼓蹲劣崩屢屢雄相賓些溟滓巨壑漚漚洶洶際乾
漚些粉榆井竈鬱參鱗些衣冠曼好愉以親些澣漫徒
倚縱怡淫些魂兮歸來娛爾神些埜腴地沃百昌阜些

冬稌夏稻菽麥秫些畛隰皇皇豐衍寒些榕櫨楮槭紛
櫛糾些荔枝龍目枕榔椶欖苾馥羞些莪葵雷荂蘭蓓
薈蔔炫綵以繡些馬纓虎掌玉屑金錢彌皋岫些鼃鼃
鱸鮑鮓鰾留些烏賊黃鯁鮓魷些洪蚶脆蚶媚連鰲
些飫脣膾舌靡不有些麇麇猩猩祁孔右些翡翠驚文鴛
鴦鵝鶻鵲還林沼些魂兮歸來從羣醜些彼都士女曼
且哲些妖童嬾嬾鬢髮霑些綦履香襦衷錦袖些冶嫺
修蛾朱脣酌些盤龍翥鳳金屈戌些頰頰橫波眸點漆

些柔荑纖纖玉環揀些綃縠襪襪揚鬢謁些跣豸嬖媚
麗射日些縱體隨風六銖襞些步虛清歌香靄滴些褫
神拂枕奉茵席些洞房沈沈娛永夕些魂兮歸來聊燕
息些錦垣綺陌萬戶開些飛甍接棟簇紆迴些木衣土
繡甲第瑤些璫樓金閣瓊香臺些駁娑薜窠譙麗鬼些
兆闌稀闌窳窳些蔓雲韜宿銀榜題些琳宮紺殿暈
毡毼些宰堵朱碧晨暎夕唄鏞鼓喈些藻梲月琴轆轤
臚臚中天而不摧些柔輪寶勒延延闐闐溶溶而往來

些魂兮歸來託呂安棲些明堂肇啓雷鼓鼗些合蕭孤
管倚雲軒些從金考石祝啟喧些和琴哀瑟明月弦些
賁黻鏡篚互節宣些黃鍾大呂旋相生些擷籥秉翟俯
仰躑躑些萬舞有奕遞便嬛些魂兮歸來聽勿諼些血
膋既酌蘭艾熏些雲俎大豆森顒庭些柔脂剛碩飭呂
腥些炮牂烹武啼角橫些鴈鳧烙雞雁鶩鯖些顧鵠鷄
鷄糜飮馨些象約熊蹯旨且盈些臠鼈磔螭魴鰈陳些
子薑香韭美錦蓐些冬菁夏筍競鮮新些玉粒金穡黍

拒杭些飪飪餽餽餽餽些冷淘溫歲土簋砌些橘柚
瓜蒸剥雞菱些紫蔗碧藕蘋朱櫻些赤棗青梅甘酢并
些縹膠玄漿露金莖些醍醐翠豔汎醪醴些徑寸敷膏
蟻浮萍些芝觴桃盃雪液澄些九香百和芳潔凝些是
饗是脩腹膨脞些魂兮歸來胥懌以寧些華簪文纓珠
履踰些胙階孔彬跂雲閣些文明儼侶巧笑綽些緹帙
彤甕輝灼爍些藏彊意錢攬六博些雉犢盧梟恣歡醪
些角中彈碁朋踴蹴些決拾弰弰命候鵠些拔河蹶張

勝相擢些養和隱囊揮塵穉些郢筒詩籌拈糾錯些關
敏爭姦喧噉噉些傳觥交舄側弁幘些傾情倒意戲而
不虐些魂兮歸來樂相樂些遠行靡屆不如歸些荒荒
六合將安依些終風且霾日月微些天昏雨濕魑魅啼
些流連忘返詰所譏些太康淫洛喪怵怩些八駿萬里
祈招悲些屈湛於湘漁父嗤些有管與荊寧姜姬些狐
兔穴窟難於埒些歸來歸來無自迷些亂曰邗溝湯湯
兮艸木莽莽鴈南征兮江之許思君兮潺湲猿狖號兮

秋雨江有蘼兮原有楸君不來兮悄離憂殘釭幢兮明
滅寒蛩鳴兮焉歇石上兮蒼苔山間兮明月君不可兮
久留歎望舒兮將沒流黃罷兮香機空春草靡兮霜葉
紅白鶴驚兮玄猿哭雲慘慘兮西風魂歸來兮哀江東

後招魂賦

有序

宋晁補之

屈原作大招魂宋玉作招魂夫士以忠放濱於死故招
其魂而復之予交之長者王安仁賢且孝適耒仕病以
天子傷焉不敢以非吾上也借不知命之辭以愬於帝

作後招魂

竊悲夫天何為生此碩人兮塞幼清而宜修既服義以
時可兮又何為委厥美而改求天固復諸其初兮則如
勿俾此昭質帝命巫陽曰有愬於下汝往聽之精神將
離筮而復之巫陽曰物死與生司命有職自廢自起朕
何能識帝彊之乃下招曰魂兮歸來去君七尺之軀胡
為乎大陰些舍君之靈龜而糟苴沈些人固懷慈而抱
愛兮一言欲訣而評評些君胡樂誘於異物兮從之蹊

跂而遠行些魂兮歸來上天不可以遊些有神當關其
視畏人些其下百鬼伺人往來執而殺之些徜徉無所
倚歎息不可些幸而得還無所求階些歸來歸來不可
以久放些魂兮歸來地下不可伏些土怪墳羊狼戾突
觸些蛇身鬼首蓬髮髻髮當前搖毒些九幽之府惡厲
牛首得人以械獄些歸來歸來不可以久屈些魂兮歸
來無止乎山中些山木蕭蕭猿狖所居些藜藿柱逕梟
祥鷲怪杜鵑號呼些夔魍罔兩笑風涕雨見人擲掄些

虺虎封狼磨牙吮血飢飢穴居些魂往顛躋狂惑失塗
些歸來歸來久幽恐不得出些魂兮歸來君無下海些
大海盪滴日月四周些白波連天五山狂浮些巨神操
蛇唯魂是因些淫氛彌霧八方錯易魂往安投些百怪
謹舞羣出類沒更遨迭遊些霹靂掣電蛟龍直起江潮
逆流些有鳥九首載鬼盈車摧筋以縻其軛些歸來歸
來久淫恐不得還些魂兮歸來君無樂兮八蠻九夷遐
方異類其人似禽些烈陽慘陰鞬裘裸裎涼溫不時些

蔽林夜祠被髮徒跣妖魅叢嬉些魂往非族抵冒凌欺
些歸來歸來恐自遺羞些魂兮歸來君無以髑髏為南
面之樂些毛枯骨化精離識落些螻蟻所寄烏鳶所博
些蚊蚋姑嘬狐狸齧些骯然七孔擥擲疇覺些棘薪
葛蔓交錯縣絡些鋤耰野火侵凌甚虐些歸來歸來無
自遺賊些魂兮歸來八紘六合無一可以翱翔些魂孤
迢迢消耗淪亡歸來歸來反故鄉些工祝前君無迷方
些崇城兩溝夾高楊些車軫馬駢交康莊些日中為市

集工商些高門懸箔襲慶祥些選閱甘旨薦北堂些金
昆玉季美雁行些斑衣竹馬兒嬉傍些曲欄橫牖窈洞
房些長蛾曼綠含芳些齊紈阿錫曳明璫些戛瑟鼓
簧封豕羊些食前方丈醜椒漿些嘉賓雜坐紛賢良些
朱顏欣欣君樂些些魂兮歸來反故鄉些亂曰龍火頽
坤兮虛正宵萬物酋敕兮傷秋郊汨君徂征兮默誰曹
天地為鑪兮物流以銷一受成形兮專莫逃斯彌頤輅
兮一體所交鼠肝蟲臂兮忽何遭魂知復古兮改而超

與君除祓兮三下招張君之夜兮升屋號魂兮歸來居
匪遙無哀我心使予勞

至治四御史賦

元吳師道

至治之元英主當御時崇梵教大啟宮宇都城嗟咨民
勞役巨蹇蹇執法四臣列疏臣直伊何繇聖明故維時
權姦竇激霆怒誅竄亟加誣以謗愬粵若古先誹木諫
鼓我元造邦責在憲府列聖虛心忠諤繼武偉茲弗褒
名節奚樹皇化更新直氣斯吐生榮歿賚寵以異數嗟

嗟在位有目斯睹恪恭爾職正直是與明明國是赫赫
王度毋利而回毋禍而懼明於一時千載彌著小儒作
詩用贊言路

弔余文賦

元涂幾

均惟皇之降衷兮何獨此為不仁負予才之宏異兮早
卓倜而莫羣既靈扃之中啓兮又精思於典墳咀天葩
以紛放兮羌不學而能文較錙銖於古人兮又何數乎
今之人詭金膏與水碧兮雜瑤玉兮前陳貫皇王之大

道兮極遐思於幽眇神姦惛而却走兮玄象摹其在手
念所得之非艱兮豈皇靈之相予若增波之赴海兮侈
援筆而成辭感靈鳥之皦皦兮耀奇苞於朱景謂流聲
之輝赫兮羌難得而與並煜予文之既積兮俟將進乎
明時馬遭迴而不進兮行中道兮險巖歲月忽其代序
兮傷美人之遲暮鳳凰飢而不食兮鴟梟讒而非侶世
貴賤之不分兮又何能兮識真襲燕石以為寶兮採魚
目以為珍衣嫫母以錦衣兮謂西施之弗好彼淑女之

含德兮蔽蓬茅以終老固達人之知命兮矢中正而不
渝甘衆進而獨退兮苟吾心之所如芟荷不可以為衣
兮藤蘿不可以為帶泣悲風之短景兮寒冰交乎水際
矧茲土之尤僻兮無朋游兮我從撫前橐以太息兮貧
何爾之能工茲命付之水火兮還神功於不宰既弗濡
於黎庶兮與元氣而俱在在天而為慶雲兮在地而為
醴泉蒸芝菌以作瑞兮結金玉而為堅俾斯民之復朴
兮無雕傷其肺腑餐元和以葆真兮予永懷乎溥素

欽定四庫全書



御定歷代賦彙補遺


卷二十一

御定歷代賦彙補遺卷二十二

謹案第三十二頁後五行漚管殿陞刊本管訛管
據詩經改

第三十二頁後七行鼓舌搖脣刊本舌訛石今改





總校官庶吉士臣張能照
校對官庶吉士臣章宗瀛
謄錄監生臣王淦

財國
法人
佛
新濟空
敬贈

